

第一百零二冊

卷一百九十

列傳二

卷一百九十一

列傳三

卷一百九十二

列傳四

新纂雲南通志

盧

漢

題

簽



新纂雲南通志卷一百九十目錄

列傳二

明

楊一清

張志淳

子舍合

毛玉

楊士雲李元陽

劉洙許鉉萬文彩

雷應龍

王廷表

黃敏才趙德宏

胡廷祿

施昱孫繼先

趙汝瀛

高崧李東

東子嗣善

新纂雲南通志卷一百九十一目錄

列傳三

明

孫繼魯嚴清

吳宗堯

包見捷

劉文徵

艾自新自修

范運吉趙重華

蕭崇業楊廷相

朱運昌朱思明

楊棟朝

新纂雲南通志卷一百九十

列傳二

明

楊一清傳

楊一清字應寧安寧人父景以化州同知致仕攜之居巴陵少能文以奇童薦爲翰林秀才憲宗命內閣擇師教之年十四舉鄉試登成化八年進士父喪葬丹徒遂家焉服除授中書舍人久之遷山西按察僉事以副使督學陝西一清貌寢而性警敏好談經濟大略在陝八年以其暇究邊事甚悉入爲太常寺少卿進南京太常寺卿弘治十五年用劉大夏薦擢都察院左副都御史督理陝西馬政西番故饒馬而仰給中國茶飲以去疾太祖著令以蜀茶易番馬資軍中用久而寢弛奸人多挾私茶闌出爲利番馬不時至一清嚴爲禁盡籠

茶利於官以服致諸番番馬大集會寇大入花馬池帝命一清巡撫陝西仍督馬政甫受事寇已退乃選卒練兵創平虜紅古二城以援固原築垣瀕河以捍靖虜劾罷貪庸總兵武安侯鄭宏裁鎮守中官冗費軍紀肅然武宗初立寇數萬騎抵固原總兵曹雄軍隔絕不相聞一清帥輕騎自平涼晝夜行抵雄軍爲之節度多張疑兵脅寇寇移犯隆德一清夜發火礮響應山谷間寇疑大兵至遁出塞一清以延綏寧夏甘肅有警不相援患無所統攝請遣大臣兼領之大夏請即命一清總制三鎮軍務尋進右都御史一清遂建議修邊其略曰陝西各邊延綏據險寧夏甘肅扼河山惟花馬池至靈州地寬延城堡復疎寇毀牆入則固原慶陽平涼鞏昌皆受患成化初寧夏巡撫徐廷璋築邊牆綿亘二百餘里在延綏者余子俊修之甚固由是寇

不入套二十餘年後邊備疎牆塹日夷弘治末至今寇連歲侵略都御史史琳請於花馬池韋州設營衛總制尙書秦紘僅修四五小堡及靖虜至環慶治塹七百里謂可無患不一二年寇復深入是紘所修不足捍敵臣久官陝西頗諳形勢寇動稱數萬往來倏忽未至徵兵多擾費旣至召援輒後時欲戰則彼不來持久則我師坐老臣以爲防邊之策大要有四修濬牆塹以固邊防增設衛所以壯邊兵經理寧夏以安內附整飭韋州以遏外侵今河套即周朔方漢定襄赫連勃勃統萬城也唐張仁愿築三受降城置烽堠千八百所突厥不敢踰山牧馬古之舉大事者未嘗不勞於先逸於後夫受降據三面險當千里之蔽國初舍受降而衛東勝已失一面之險其後又輟東勝以就延綏則以一面而遮千餘里之衝遂使河套沃壤爲寇巢穴

深山大河勢乃在彼而寧夏外險反南備河此邊患所以相尋而不可解也誠宜復守東勝因河爲固東接大同西屬寧夏使河套方千里之地歸我耕牧屯田數百萬畝省內地轉輸策之上也如或不能及今增築防邊敵來有以待之猶愈無策因條其便宜延綏安邊營石澇池至橫城三百里宜設墩臺九百座暖譙九百間守軍四千五百人石澇池至定邊營百六十三里平衍宜牆者百三十一里險崖峻阜可剗削者三十二里宜爲墩臺連接寧夏東路花馬池無險敵至仰客兵宜置衛興武營守禦所兵不足宜召募自環慶以西至寧州宜增兵備一人橫城以北黃河南岸有墩三十六宜修復帝可其議大發帑金數十萬使一清築牆而劉瑾憾一清不附己一清遂引疾歸其成者在要害間僅四十里瑾誣一清冒破邊費逮下錦衣獄

大學士李東陽王鏊力救得解仍致仕歸先後罰米六百石安化王  
寘鐸反詔起一清總制軍務與總兵官神英西討中官張永監其軍  
未至一清故部將仇鉞已捕執之一清馳至鎮宣布德意張永旋亦  
至一清與結納相得甚歡知永與瑾有隙乘間扼腕言曰賴公力定  
反側然此易除也如國家內患何永曰何謂也一清遂促席畫掌作  
瑾字永難之曰是家晨夕上前枝附根據耳目廣矣一清慷慨曰公  
亦上信臣討賊不付他人而付公意可知今功成奏捷請問軍事  
因發瑾奸極陳海內愁怨懼變起心腹上英武必聽公誅瑾瑾誅公  
益柄用悉矯前弊收天下心呂強張承業暨公千載三人耳永曰脫  
不濟奈何一清曰言出於公必濟萬一不信公頓首據地泣請死上  
前剖心以明不妄上必爲公動苟得請即行事毋須臾緩於是永勃

然起曰嗟乎老奴何惜餘年不以報主哉竟如一清策誅瑾永以是德一清左右之得召還拜戶部尙書論功加太子少保賜金幣尋改吏部一清於時政最通練而性闊大愛樂賢士大夫與共功名凡爲瑾所構陷者率見甄錄朝有所知夕即登薦門生徧天下嘗再帥關中起偏裨至大將封侯者累累然不絕饋謝有所入緣手即散之大盜躡中原一清疏請命將調兵前後凡數上皆報可盜平加少保太子太保廕錦衣百戶再推內閣不用用尙書靳貴而進一清少傅太子太傅給事中王昂論選法弊指一清植私黨帝爲謫昂一清更申救優旨報聞乾清宮災詔求直言一清上書言視朝太遲享祀太慢西內創梵宇禁中宿邊兵畿內皇店之害江南織造之擾因引疾乞歸帝慰留之大學士楊廷和憂去命一清兼武英殿大學士入參機

務張永尋得罪罷而義子錢寧用事寧故善一清有構之者因蓄怨會災異一清自劾極陳時政中有狂言惑聖聽匹夫搖國是禁廷雜介胄之夫京師無藩籬之託語譏切近倖帝弗省寧與江彬輩聞之大怒使優人於帝前爲蜚語刺譏一清時有考察罷官者嗾武學生朱大周訐一清陰事而以寧爲內主給事御史周金陳軾等交章劾大周妄言請究主使帝不聽一清乃力請骸骨歸賜敕褒諭給大廩如制帝南征幸一清第樂飲兩晝夜賦詩賡和以十數一清從容諷止帝遂不爲江浙行世宗即位廷臣交薦一清乃遣官賜金幣存問諭以宣召期趣使有言一清陳謝特予一子官中書舍人嘉靖三年十二月戊午詔一清以少傅太子太傅改兵部尙書左都御史總制陝西三邊軍務故相行邊自一清始溫詔褒美比之郭子儀一清至

是三爲總制部曲皆踴躍喜亦不刺竄西海爲西寧洮河害金獻民  
言撫便獨一清請勦土魯番求貢陳九疇欲絕之一清則請撫時帥  
諸將肄習行陣嘗曰無事時當如有事隄防有事時當如無事鎮靜  
會張璁等力排費宏御史吉棠因請還一清內閣給事中章僑御史  
侯秩等爭之帝謫秩官召一清爲吏部尙書武英殿大學士旣入見  
加少師仍兼太子太傅非故事也亡何獻皇帝實錄成加太子太師  
謹身殿大學士一清以不預纂修辭不許王憲奏捷推功一清加特  
進左柱國華蓋殿大學士費宏已去一清遂爲首輔帝賜銀章二曰  
耆德忠正曰繩愆糾違令密封言事與張璁論張永前功起爲提督  
團營給事中陸粲請增築邊牆推明一清曩時議一清因力從臾之  
帝爲發帑金命侍郎王廷相往然久之亦竟止明倫大典成加正一

品俸初大禮議起一清方家居見張璫疏寓書門人喬字曰張生此  
議聖人復起不能易也又勸席書早赴召以定大議璫等既驟顯頗  
引一清帝亦以一清老臣恩禮加渥免常朝曰講侍班朔望朝參令  
晨初始入閣視事御書和章及金幣牢醴之賜甚渥所言邊事國計  
大小無不傾聽璫與桂萼既攻去費宏意一清必援己一清顧請召  
謝遷心怨之遷未至璫已入內閣多所更建一清引故事稍裁抑其  
黨積不平錦衣冑能遷訐璫璫欲置之死一清不可璫怒上疏陰詆  
一清又嗾黃綰排之甚力一清疏辨言璫以能遷故排己且傍及璫  
他語因乞骸骨帝爲兩解之一清又因災變請戒飭百官和衷復乞  
宥議禮諸臣罪璫益憾桂萼入內閣亦不相能一清屢求去且言今  
持論者尙紛更臣獨主安靜尙刻覈臣獨主寬平用是多齟齬願避

賢者路帝復溫旨褻之而給事中王準陸粲發璫璫招權納賄狀帝立罷璫璫且暴其罪其黨霍韜攘臂曰張桂行勢且及我遂上疏力攻一清言其受張永蕭敬賄一清再疏辨乞罷帝雖慰留之而璫復召還韜攻益急且言法司承一清風指構成璫罪帝果怒令法司會廷臣雜議出刑部尙書周倫於南京以侍郎許讚代讚乃實韜言請削一清籍帝令一清自陳璫乃三上密疏引一清贊禮功乞賜寬假實以堅帝意俾之去帝果允致仕馳驛歸仍賜金幣明年璫等構朱繼宗獄坐一清受張永弟容金錢爲永誌墓又與容世錦衣指揮遂落職閒住一清大恨曰老矣乃爲孺子所賣疽發背死遺疏言身被污讎死且不瞑帝令釋賊罪不問後數年復故官久之贈太保諡文襄一清生而隱宮貌寺人無子博學善權變尤曉暢邊事羽書旁午

一夕占十疏悉中機宜人或嘗已反薦揚之惟晚與璵莒異爲所軋

不獲以恩禮終然其才一時無兩或比之姚崇云

明史本傳

贊曰明代多才臣然能以身負天下之重責淵淳嶽峙寵辱不改其度者得兩人焉一爲張居正一爲楊一清一清功在西北料敵如神所振拔文武之材無不有大功於國古之所謂以人事君者豈非社稷之臣哉

### 張志淳傳

子合

張志淳字進之號南園永昌人也性敏睿通六藝登成化甲辰進士歷官南戶部右侍郎其出官南戶部也蓋以張綵之陷綵爲稽勲郎值邊警以談兵動當事當事復詢之志淳志淳素知綵大姦險無學術意不可任以質對而馬端肅曾庭斥之公安趙給事亦許其陰事

綵始告病志淳時任選部郎陰屬爲加學行上考志淳弗允綵深銜之洎還劉瑾專政以重賂進起復爲文選郎陞僉都歷吏侍大柄在握志淳遂被劾歸歸後日惟杜門而已久之復以他事被構幾罹大禍云志淳任選部郎時用賢拔滯門無私謁與天臺黃元昭齊名正德初擢太常少卿提督四譯館懲入館子弟空名之弊一變舊習時論多之旣謝病歸以圖書自娛所著南園漫錄永昌二芳記四庫全書均著錄南園集與西銘通經兵燹多散失矣李夢陽稱其老而傳十倍沐劉杭三子浙鄞陳沂稱其論道德於文章暢性情於詩律可爲世訓云卒祀鄉賢子二曰含曰合

含字愈光號禺山正德丁卯舉人少隨父客京師與楊慎爲詩友方試場屋聲名藉甚公卿間受知於其父執樂平喬字宇欲其速仕令

從銓選執不可後客梁宋爲李夢陽所知因師事之所學益進七試  
春官不第嘉靖癸卯將謁選未及都門而返曰仕以行吾志也而仕  
未必得志詩言志吾其伸於詩乎且吾與其譁世以爲榮也孰若寂  
處而自樂乎吾將歸太保山升明詩臺以嘯歌畢吾志矣於是大肆  
力於詩迨楊慎成滇西李元陽胡廷祿皆桂冠歸時相酬唱所得益  
富楊慎稱其詩博極羣書條入葉貫雄辯邃古神搜霆擊上獵漢魏  
下汲李杜寢歌途弔鞠明究隳弗工弗康弗似弗止又稱其文句必  
弓左字必科籀萬卷之富聚若囊括一經之士不能獨詁崔銑唐胄  
任瀚陳沂等亦皆爲之序備致推挹云詩中投贈師友之什皆情意  
拳拳然常自言凡於吐辭寄贈在窮困節義之交頗有萬言不竭之  
才於通達周旋之友輒有片言即窮之拙其風概如此

合字懋觀號賁所嘉靖壬辰進士刑部主事歷湖廣副使以疾告歸性嗜學手不釋卷善書畫權貴造請輒卻之居鄉不談公事時欲清查夷田人心洶洶乃爲書五千言達之當事事遂寢卒祀鄉賢江西按察僉事許穀稱其忠蓋在朝宁事功在屏藩勛名在彝鼎緒餘在文章所著有賁所詩文集宙載等書兵燹後多遺失宙載一書民國

十三年由江蘇圖書館鈔獲重刊雲南叢書中

以上明滇南詩略雲南叢書

贊曰張氏父子兄弟文行卓卓譽流三迤韻著千秋甚盛事也或以比眉山蘇氏豈無所見而云然哉志淳立朝正色排斥奸黨汲引幽滯風節凜凜不可犯直聲震輦轂下今尙傳其南園漫錄足見精博其餘多爲劫灰可惜也含壹志於詩故所造獨高評者謂其出入風雅凌厲古今肆而能純華而不縻其堅光切響有不可磨滅於天地